



Iskreni savjeti za postizanje dobra (Medina)

Hatib: dr. Ahmed ibn Talib ibn Abdulhamid

29. džumadel-uhra 1442. po Hidžri / 12. februar 2021.

Sva hvala i zahvala pripadaju Allahu. Njega hvalimo, od Njega pomoć i oprost tražimo i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko Ga ne može uputiti. Svjedočim da nema boga osim Allaha, Jedinog, Koji druga nema. Svjedočim da je naš prvak Muhammed, sallallahu alejhi ve sellem, Njegov rob i poslanik, i Njegov odabranik među stvorenjima, i Njegov prijatelj, dostavio poslanicu, ispunio emanet, savjetovao ummet i borio se na Allahovom putu onako kako se treba boriti sve dok mu nije došla smrt, neka su na njega Allahova milost, i na njegovu čistu i neporočnu porodicu, i njegove supruge, majke pravovjernih, i njegove ashabe, iskrene vjernike, i sve one koji ih slijede u dobročinstvu do Sudnjeg dana. Bojte se Allaha, o ljudi, i držite se čvrstog užeta islama, i znajte da je najistinitiji govor Allahova Knjiga, najbolja uputa je uputa Muhammeda, sallallahu alejhi ve sellem. Najgore stvari u vjeri su novotarije, svaka novotarija je zabluda, a svaka zabluda vodi u Vatru. O vjernici, znajte, Allah ispunio vaše živote pokornošću Njemu i vodio vas putem Njegovih miljenika, da je izvor upute i svakog dobra Objava. Ko shvati i spozna Objavu, neće imati potrebu za nečim drugim, a ko zanemari Objavu, neće mu koristiti ništa drugo.

Uzvišeni Allah kaže: "Zar ne znaju nevjernici da su nebesa i Zemlja bili jedna cjelina, pa smo ih Mi raskomadali, i da Mi od vode sve živo stvaramo? I zar neće vjerovati?"

Mi smo po Zemlji nepomične planine razmjestili da ih ona ne potresa, i po njima smo staze i bogaze stvorili da bi oni kuda žele stizali. I to što je nebeski svod osiguran Naše je djelo, a oni se ipak okreću od znamenja koja su na njemu. I noć i dan Njegovo





su djelo, i Sunce i Mjesec, i svi oni nebeskim svodom plove. Nijedan čovjek prije tebe nije bio besmrtni; ako ti umreš, zar će oni do vijeka živjeti? Svako živo biće smrt će okusiti! Mi vas stavljamo na kušnju i u zlu i u dobru i Nama ćete se vratiti. Kada te vide nevjernici, samo ti se rugaju: ‘Je li to onaj koji vaše bogove huli?’ A oni sami ne vjeruju kada se spomene Milostivi. Čovjek je stvoren od žurbe. Pokazat ću Ja vama, doista, dokaze Svoje, zato Me ne požurujte! Oni govore: ‘Kada će već jednom ta prijetnja, ako istinu govorite?’ A da nevjernici znaju da tada neće moći otkloniti vatru od lica svojih i leđa svojih, i da im niko neće moći pružiti pomoć, nego će im nenadano doći i zaprepastiti ih i neće je moći nazad vratiti i neće im se vremena dati! I prije tebe su poslanike ruglu izvrgavali, pa je one koji su im se rugali stiglo baš ono čemu su se rugali. Reci: ‘Ko će vas od Milostivog noću i danju štititi?’ Niko! Pa ipak oni od Kur’ana glave okreću. Zar će ih njihova božanstva, a ne Mi, odbraniti? Ta ona sama sebi ne mogu pomoći, i niko nevjernike od Naše kazne ne može pod okrilje uzeti! Mi smo ovima, a i precima njihovim, dali da uživaju, pa su im dani radosti dugi. A zar oni ne vide da Mi u zemlju njihovu dolazimo i da je s krajeva njezinih umanjujemo, pa kako bi oni bili pobjednici?! Reci: ‘Ja vas opominjem Objavom!’ – ali, gluhi ne čuju poziv kad se opominju. A da ih samo dašak kazne Gospodara tvoga dotakne, sigurno bi povikali: ‘Teško nama, doista smo sami sebi nepravdu učinili!’ Mi ćemo na Sudnjem danu ispravne terazije postaviti, pa se nikome krivo neće učiniti; ako nešto bude teško koliko zrno gorušice, Mi ćemo za to kazniti ili nagraditi. A dosta je to što ćemo Mi račune ispitivati.” (El-Enbija, 30–47)

O vjernici, jedan od znakova Allahovog okretanja od čovjeka jeste da se on bavi onim što ga se ne tiče, a glavni pokazatelj onoga što nas se ne bi trebalo ticati jeste da je to svaka stvar za čije ostavljanje nećemo biti grešni i nećemo uzrokovati štetu ni sebi ni drugima, ni trenutno ni u budućnosti. Trebamo se baviti samo onim što će poboljšati kvalitet našeg dunjalučkog života i što će nam donijeti nagradu na budućem svijetu. Poslanik, sallallahu alejhi ve sellem, rekao je: “Jedan od znakova potpunosti čovjekove vjere jeste da ostavi ono što ga se ne tiče.” Znajte da će svaki upropašteni trenutak života biti uzrokom velikog kajanja. Ko bude volio zabranjene stvari i





prepusti se zabavi i razonodi, osjetit će gorčinu savjeta i njegovog prihvatanja. Nemojte biti od onih koji oskudijevaju u dobrim djelima i posebnim stanjima pobožnosti. Budite sigurni da formalno znanje, bez konkretnih djela, ne donosi nikakvu korist i da se Allahova milost ne može postići osim dobrim djelima, makar u srcu nosili koliko god hoćemo znanja. Na kraju, kada presahnu riječi, neće nam koristiti ništa drugo osim rekata koje smo iskreno obavili. “Zato se ti okani onoga koji Kur’an izbjegava i koji samo život na ovome svijetu želi – to je vrhunac njihova znanja – Gospodar tvoj dobro zna one koji su skrenuli s Njegova puta i On dobro zna one koji su na pravome putu. Allahovo je sve što je na nebesima i što je na Zemlji – da bi, prema onome kako su radili, kaznio one koji rade zlo, a najljepšom nagradom nagradio one koji čine dobro, one koji se klone velikih grijeha i naročito razvrata, a grijeha bezazlene On će oprostiti jer Gospodar tvoj, zaista, mnogo prašta – On dobro zna sve o vama, otkad vas je stvorio od zemlje i otkad ste bili zameci u utrobama majki vaših; zato se ne hvališite bezgrešnošću svojom – On dobro zna onoga koji se grijeha kloni. Reci ti Meni o onome koji istinu izbjegava i malo udjeljuje, i posve prestane udjeljevati, zna li on ono što je skriveno, pa vidi? Zar on nije obaviješten o onome šta se nalazi u listovima Musaovim i Ibrahimovim – koji je obaveze potpuno ispunjavao – da nijedan grešnik tuđe grijeha neće nositi, i da je čovjekovo samo ono što sam uradi, i da će se trud njegov, sigurno, iskazati, i da će prema njemu u potpunosti nagrađen ili kažnjen biti, i da će se Gospodaru tvome ponovo vratiti.” (En-Nedžm, 29–42)

Poslanik, sallallahu alejhi ve sellem, rekao je: “Kada čovjek umre, prekidaju se njegova dobra djela osim u tri slučaja: trajna sadaka, korisno znanje ili čestito dijete koje moli za njega.” Islam nije ništa drugo do građevina čiji su stubovi dva šhadeta – svjedočenja: svjedočenje da je Allah Bog i svjedočenje da je Muhammed Njegov rob i poslanik, namaz, zekat, post i hadž – hodočašćenje Allahove časne kuće. Ko učvrsti stubove, podići će građevinu. Čija djela budu slaba, živjet će u strahu. Čiji stubovi budu slabi, urušit će se njegovi zidovi. Uzvišeni kaže: “I oni prije njih su spletke pleli, pa je Allah iz temelja zgrade njihove porušio, i krov se na njih srušio – stigla ih je





kazna odakle nisu očekivali. A na Sudnjem danu On će ih osramotiti i upitati: ‘Gdje su oni koje ste Meni ravnim smatrali, oni zbog kojih ste se prepirali?’ Oni koji su razumni reći će: ‘Danas će bruka i muka nevjernike stići kojima su meleki dušu uzeli u času kad su nevjernici bili. I oni će se pokoriti i reći: ‘Mi nismo nikakvo zlo činili!’ ‘Jeste, Allah, doista, dobro zna ono što ste radili, zato ulazite na kapije Džehennema, u njemu ćete vječno ostati!’ O kako će prebivalište onih koji su se oholili – grozno biti!’ (En-Nahl, 26–29)

Spasa od propasti postiže se samo znanjem, vjerovanjem, djelovanjem, preporučivanjem istine i preporučivanjem strpljivosti. Uzvišeni kaže: “Tako Mi vremena – čovjek, doista, gubi, samo ne oni koji vjeruju i dobra djela čine, i koji jedni drugima istinu preporučuju i koji jedni drugima preporučuju strpljenje.” (El-Asr, 1–3)

Bojte se Allaha, o ljudi, i budite sa iskrenima, i znajte da Allah Uzvišeni kaže: “Onima koji budu vjerovali i dobra djela činili – džennetske bašče će prebivalište biti, vječno će u njima boraviti i neće poželjeti da ih nečim drugim zamijene. Reci: ‘Kad bi more bilo mastilo da se ispišu riječi Gospodara moga, more bi presahlo, ali ne i riječi Gospodara moga, pa i kad bismo se pomogli još jednim sličnim.’ Reci: ‘Ja sam čovjek kao i vi, meni se objavljuje da je vaš Bog – jedan Bog. Ko žudi da od Gospodara svoga bude lijepo primljen, neka čini dobra djela i neka, klanjajući se Gospodaru svome, Njemu nikoga ne pridružuje!’” (El-Kehf, 107–110)

Dobro djelo je ono koje je iskreno i ispravno. Iskreno je ako je u ime Allaha, a ispravno je ako je u skladu s uputom Poslanika, sallallahu alejhi ve sellem. Bojte se Allaha u pogledu činjenja dobrih djela i ostavljanja onoga što je zabranio Veliki i Uzvišeni i ostavite se kitnjastih riječi. Neka se istinski raduje onaj ko je shvatio opomenu, slijedi Allahovu uputu, ne boji se nikoga osim Allaha i ubijeden je u susret sa Gospodarom. Uzvišeni kaže: “Tvoja opomena će koristiti samo onome koji Kur’an slijedi i Milostivoga se boji, iako Ga ne vidi; njega obraduj oprostom i nagradom lijepom! Mi ćemo, zaista, mrtve oživiti i Mi smo zapisali ono što su uradili





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

i djela koja su iza sebe ostavili; sve smo Mi to u Knjizi jasno pobrojali.” (Ja-sin, 11–12)

Znajte da će mizan, vagu na Sudnjem danu, ispuniti riječi “elhamdulillah”, pretegnuti riječi “subhanallahi ve bi hamdihi, subhanallahil-azim”, i da će najteže djelo na mizanu biti lijepo ponašanje, a da je gubitak na mizanu ono što je Allah pobrojao, a ti zaboravio, i da će tas loših djela spustiti ako iskreno iz svog srca kažeš “la ilahe illallah”, i da konačan sud pripada Allahu.

Donosite salavate i selame na Allahovog Poslanika, to vam je Allahova naredba: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!” (El-Ahzab, 56)

